

# DE LAUDIBUS FRANCISCI I.

ROMANORUM IMPERATORIS

ELECTI

ORATIO FUNEBRIS

MARCELLI CHEROFINI


SANCTISSIMI D. N. CLEMENTIS XIII. PONT. MAX.  
PRÆLATI DOMESTICI.



ROMÆ MDCCLXVI.

EX TYPOGR. S. MICHAELIS, APUD FRANCISCUM BIZZARRINI KOMAREK  
PROVISOREM LIBRORUM S. R. E. IN BIBLIOTHECA VATICANA.

*SUPERIORUM PERMISSU.*



( III )

# JOSEPHO II.

ROMANORUM IMPERATORI  
ELECTO &c. &c. &c.

MARCELLUS CHEROFINIUS

FELICITATEM.



**I** quis forte consi-  
lium meum esset  
improbaturus, quod Tibi potissimum,  
**JOSEPHO II.** Imperator, nuncupare  
statuerim hanc Orationem, quam Car-  
**A 2** dinalis

( IV )

dinalis Albanus apud SUMMUM PONTIFICEM Orator tuus a me habendam jusserat , quum Romæ FRANCISCO I. Patri tuo funerum iusta solemni pompa publice persolverentur: is profecto de animi tui magnitudine quid vere sentiendum sit mihi ignorare videretur. Etenim nihil aliud esset, cur ille mihi subirasceretur, nisi quod Te gravissimis distentum curis, hoc præsertim auspiciatissimo Regni tui initio, interpellare ausus fuerim, quodque periculum sit, ne dum benigne mecum agere velis, illatum Tibi Augusti Parentis interitu acerbissimum vulnus recrudescat. Verum probe noverunt homines, qui virtutum omnium ornamenta & decora simul in Te congesta suspiciunt & admirantur, qua constantia, fortitudine, animique præsentia Te gesseris, cum inter regales nuptias una Tecum repentino illo casu universa Europa mœrore & luctu completa est; nihil enim a Te omissum accepimus, quo eximia amantissimi Filii erga Parentem opti-

optimum charitas aliqua ex parte desiderata fuerit , nihil vero a Te actum , quod demissi fractique animi indicio esse posset. Siquidem qui ad imperia natus est , ad omnes quoque fortunæ vires ita paratum esse oportet , ut vel in maximi doloris acerbitate regios ille semper & mores , & ingenium præferat . Nunc autem si quis intueatur quantus in imperio sis , quem in populos amorem , quam in capiendis consiliis prudentiam , quam in coercendis malis artibus sollicitudinem & curam , quam in Deum Opt. Max. pietatem & religionem , quam denique in singulos æquitatem , mansuetudinem , pronamque ad beneficia voluntatem ostendas , continuo ille quidem intelliget , Te post tantam , ac tam magnam Augustæ Domus jacturam Tibi Patrem , Virum numeris omnibus absolutum , atque omni laudum genere spectatissimum ad imitandum proposuisse . Non enim decet filios , ut exemplo Ipse tuo doces , paternorum duntaxat bonorum ac for-

( VI )

tunarum , verum etiam , quod longe præstantius , atque utilius est , eximiarum omnium virtutum , ut Tullio placuit , optimorumque morum hæreditatem adire ; turpe siquidem esset , quæ caduca sunt , avidissime arripere , quæ vero immortalia , depresso ac fastidienti supercilio respuere , & averfari . Quandoquidem vero quorum exemplis utimur ad vitam , moresque nostros instituendos , eorum quoque laudes arrectis auribus libentissime accipimus , & literis consignatas evolvimus : quî subvereri possum , ut audaciæ , & imprudentiæ nota Orationi huic meæ inuratur , quæ cum tota sit in Augusti Parentis tui laudibus contexendis , Tibi præcipue JOSEPHE II. Imperator , qui Illi in imperio , unaque in bonarum omnium artium studio successor factus es , omnino sistenda videbatur ? Æquo igitur accipias animo , si Majestati , amplissimoque tuo inscripta Nomini vulgata est , libensque eam patere se Tibi non exterarum , sed domesticarum rerum


rum præconiis cumulatifsimam commendare. Habebit cur sibi plaudet, si tuo, licet innumeris Imperii negotiis implicitus sis, patrocinio fulciri, & si, modo per otium liceat, manibus se tuis contrectari sentiat. Sed ut verissime loquar, jam habuit, quæ sibi optaverat. Quod enim fausto felicitique omine populorum commodis, & utilitati prospiciens quodammodo vaticinata fuerat, id illa in ipso Regni tui initio, cum optima gubernandi ratione inita præconceptam de Te, deque tuis moribus opinionem expleveris, uberrime consecuta est. Non itaque miramur, si brevi hoc temporis intervallo doloris ac mœstitiæ gemitus hilares animorum præ gaudio gestientium significationes exceperint, sique Germanici Imperii Urbes, si Austriacæ Domus Provinciæ & Regna, si Etruria, si demum omnes & luctum & lacrimas cum lætitia commutaverint; siquidem jam minus illis factum est, quod in Patre e vivis sublato damnum acceperant, quum

( VIII )

tantam sese, ac tam magnam generosissimis in Filiis maximarum virtutum præstantia, & amplitudo explicuerit, & in conspectum omnium lucemque prodierit. Utinam quantum vitæ Illius, qui æterna posterorum memoria victurus tam cito naturæ cessit, detractum est, tantum Augustæ Conjugi **MARIÆ TERESIÆ**, sapientissimæ tot Regnorum Moderatrici, quam nemo satis pro dignitate unquam laudaverit, tantum Tibi, **JOSEPHÆ II.** Imperator, tantum reliquis Austriacæ, & Lotharingicæ Familiæ Principibus Dei Opt. Max. beneficio addatur. Nullus enim omnino dubito, quin Vobis Illi diutissime superstitibus æterna etiam quodammodo, atque immortalis perseveratura sit populorum felicitas, Augustæ Domus splendor ac decus, & quod maxime optandum est, firmissima Sacerdotii, & Imperii conjunctio.

ORA-





## O R A T I O .



Uod a DEO Opt. Max. precabamur, Auditores, ut diuturniori, quoad fieri posset, imperio FRANCISCUS I. Imperator electus florenti adhuc ætate Vir, firmæque valetudine frueretur, id pro voto nobis non cessisse misero quodam Europæ fato nuperrime condoluimus. Audistis jam ferme quatuor ab hinc mensibus, Eum inter privata, & publica gaudia apud Breunos commorantem immatura morte fuisse nobis ereptum, & quam urbem maiestate sua vivus cohonestaverat, eam mortuum acerbo luctu, ac mæro-

mœrore complevisse . Meministis Conjugis Augustæ lacrimas, nobilissimæ, ac numerosæ Sobolis gemitus, cunctorum pene populorum fletus, quibus idcirco uberior data est doloris occasio, quod illum, dum adhuc viveret, veluti carissimum Sponsum, Parentem optimum, Principem vero numeris omnibus absolutum amplexi fuerint, atque suspexerint . In hoc autem luctuosissimo, tristissimoque casu, quam partem sibi sumpsit hæc Urbs amplissima, quam ex quocunque Ordine cives, quam demum Aulæ Romanæ Proceres, vos ipsi scitis . Hæc enim una omnium vox & lamentatio: miserrimum omnino esse, & infortunii loco ponendum Eum nobis Imperatorem e sinu avulsum, qui præcipuas, quæque Viro Principe dignæ sunt, virtutes omnes in se uno complexus est, qui sibi semper laudi duxit populorum commodis & quieti consulere, & Cui, utpote amantissimo Filio suo, tuendi se ac defendendi munus universa Ecclesia commiserat . Quibus ego vocibus libentissime assentior, illudque & ego fateor non exiguo, imo quam maximo Reipublicæ damno accidisse, ut Is supremum tam cito diem obierit, quem de Se, de Suis, de ceteris omnibus optime meritum prædicamus . Quandoquidem vero vehementi hoc, & inopinato luctu perculsis, abortisque mentibus nostris doloris solatium aliquod querendum est, ex quo illud potissimum fonte, nisi ab Ejus laudibus, derivari in nos poterit ? Quis enim non existimaverit, maximam illam de ejus pridem obitu conceptam animi ægritudinem aliqua

qua ex parte sibi imminutam , ubi ad eximiarum contemplationem virtutum , admirationemque traduci se sentiat ? Ita profecto fiet , ut si universa Respublica summo se Viro orbatam nuper ingemuit , hoc quoque agnoscat, tanto cum vixisse tempore , quanto opus fuerat ad omnium sibi posterorum existimationem vindicandam .

Quod dum facio more institutoque majorum, & in hac tanta hominum frequentia, qui ei funerum iusta persolutori huc convenerunt, liceat mihi ea omnia, quæ ipsi fuerunt commendationis ad gloriam, ad tria veluti capita revocare , & in iis titulis immorari, quos olim Imperatorum majestati inscriptos populorum invexit assentatio, & posteritas consecravit . Vere igitur PIUM, vere FELICEM, vere PATREM PATRIÆ FRANCISCUM I. Imperatorem vobis constituo, illumque omnium prædicatione & laude dignissimum judico, quod Pietate sua, Felicitate, & Amore in populos immortale sibi nomen conciliaverit . Hæc sunt, in quorum contemplatione tota hæc mea versabitur oratio, quibusque rite perpenſis satis æternæ FRANCISCI memoriæ, satis vobis, quos desiderium illius tenet, satis mihi, qui gravissimum ejus laudandi munus suscepi, consuluisse arbitror .

Atque hic initio probe intelligo amplissimam mihi causam ad dicendum propositam, in qua, adeo magna est rerum ab eo recte gestarum varietas & copia, late vagari, ac quodammodo exultare possit oratio . Etenim quum FRANCISCUM vere Pium appello, nolite arbitrari, Auditores, par-

( XII )

parvam aliquam me Ei gloriam conflare, quin  
imo contendo, ubi Eum vobis hoc nomine com-  
mendavero, cetera laudum & ornamentorum  
genera ad hoc unum referri. Sint reliqui Reges,  
licet per me, militari virtute præstantes, & inter  
bellorum strepitus regnorum, suæ vitæ periculo,  
securitati prospiciant. Sint prudentes, & prom-  
pto quocunque in discrimine animo & consilio,  
sint munifici, sint liberales: si tamen pietatem  
ab illis auferas, aut languentem, ac pene emor-  
tuam in ipsis exhibeas, magnos fortasse, ut est  
captus hominum, Viros, non autem tales eos  
adfirmaverim, quales & imperii majestas, & o-  
ptima populorum institutio, ipsa demum Chri-  
stiana Respublica omnino videtur expostulare.  
Da mihi ipsorum aliquem pium, da religiosum,  
da vitæ integrum & innocentem: tunc sane verum  
Regem agnosco, iisque ornatum moribus, qui  
cunctorum oculos in admirationem sui rapiant.  
Et quidem si præteritorum temporum rationem  
habeatis, facili negotio intuebimini, Auditores,  
nonnullorum Principum pietati tribuendum ef-  
fe, quod dulcissima apud nos sit ipsorum nomi-  
nis recordatio. Quid Constantinum illum Ma-  
gnum, quid Theodosium, quid Henricum II.,  
quid Carolum Quintum, quid, ne longior sim,  
hac nostra ætate Carolum VI. Imperatorem,  
nisi pietas ad amplissimum gloriæ fastigium eve-  
xit? Quibus licet armorum splendor non parum,  
imo abunde laudis contulerit, tamen si nulla al-  
lia præter Religionis studium eos celebrandi caus-  
sa suppeteret, hac una apud nos essent commen-  
datio-

( XIII )

datione contenti . Etenim intellexissent præcipuum , ac præstantissimum optimi Principis munus uberrime se expleturos , ubi longe a fœcordia , a luxu , ab otio , a ceteris omnibus malis artibus exemplo ipsimet suo populos , quos regendos a Deo acceperant , bonis moribus instruerent , & ad pietatem , honestatemque compo-  
nerent .

Hæc animo FRANCISCUS reputans , illudque cogitans , Religionem , quæ sancto & pio summi Numinis cultu continetur , quamvis univerforum sit , sibi tamen peculiari quodam modo colendam , qui imperio fungeretur , vix dici potest qua cura , quoque studio ad reliquorum exemplar omnes suæ vitæ rationes integerrime semper instituerit . Siquidem regia illa , ac nobilissima Familia natus , quæ morum suavitate , innocentia , atque omni virtutum genere in Lotharingia jamdiu dominabatur , castissimæque sanctissimorum Parentum disciplina instructus probe vel ab incunte ætate cognovit sibi altius , quam ceteris privatis hominibus , in exequendis pietatis officiis enitendum , ubi vellet a domesticis Majorum suorum exemplis ne tantulum quidem deflectere . Optimis hisce artibus ac præceptis eruditus , & ad hoc suo ipse ingenio ultro currens adeo firma virtutum omnium in hoc pietatis studio fundamenta constituit , ut deinceps toto vitæ curriculo nihil fuerit , quod homines in eo reprehenderent , multa vero & maxima , quæ imitarentur .

Dabitis mihi hanc veniam , Auditores , ut in  
laudan-

( XIV )

laudando Viro a Religione populis commendatissimo, non ea præteream, ne parva quidem, ceterisque communia, quæ maximæ adversus ipsam Religionem observantiæ dedit argumenta. Desideratis ne cum vobis Principem, qui in aduendis divinis mysteriis summa assiduitate, ac reverentia nemini cesserit, qui nullum diem elabi passus fuerit, quo augustissimum illud Sacrificium ad homines Deo conciliandos institutum præsentem se fieri non curaverit? Desideratis ne illum quam sæpiissime sacras conciones audientem, aut in genua provolutum culparum suarum humillime veniam expetentem, cælestique Christi pabulo singulis hebdomadibus enutritum? Hæc omnia FRANCISCUS egit, neque hæc privatim, sed publice, non ad inanem quamdam, futilemque pietatis ostentationem, sed sincere, sed caste, & ab omni simulationis specie remotus. Neque vero in animum inducat leviora hæc parvique esse momenti, quod reliqui homines eadem hæc faciant, quibus persuasum sit suavissimis Christi legibus non animo tantum, verum etiam operibus & re omnino esse parendum. Etenim Regum alia, alia vero ratio privatorum hominum habenda est. Illi gravissimis regni curis distenti, & multiplici rerum mole oppressi, ac pene obruti remissiores aliquando sunt in Religionis officiis; istorum vero, quibus temporis abunde est, pronior etiam & alacrior fit in illis obeundis voluntas. Quibus igitur Te dignum laudibus, FRANCISCE, ( liceat mihi quasi præsentem alloqui ) dixerim, qui optimæ Regni

gni Tui administrationi, innumerisque, quibus detinebaris, negotiis satis per Te cautum es arbitratum, ubi singulis diebus, coram omnibus a divinis rebus, & a pietate exordireris; itaque ostenderes cum probatissimam regnandi inire rationem, qui publicum bonum cum Religionis bono conjungat. Hinc sane factum est, ut qui Augusta in Domo tua vel officii, vel honoris causa versarentur, nihil præ se unquam tulerint, quod non sanctum, non integrum, non ab omni reprehensione alienum esset; nihil enim a Te probatum iri intellegebant, quod aliquo modo a Religionis castitate abhorreret. Itaque Te hisce tam piis moribus prædito quid ipsi Sacrorum Præsides, & Administri sibi metuerent, imo potius quid non sibi promitterent? Illos enim in iis, quæ Sacerdotalis juris sunt, consiliorum tuorum participes, illos in dubiis suasores, auctoresque rerum agendarum, illos amplissimis muneribus tuis locupletatos accepimus. Audivimus Tempia a fundamenti crecta, ac pretiosis ornamentis instructa, ubique piæ munificentiae, ac liberalitatis impressa vestigia, nihil a Te eo consilio tentatum, quo Ecclesiasticæ aut libertati, aut dignitati offensus aliqua posset afferri. Quapropter universæ Christianæ Reipublicæ, Tibique vehementissime gratulor, quod cum illa in Te Imperatorem nata fuerit, qualem in votis habuerat, Teque illi majestatis suæ propugnatorem, defensoremque præstiteris.

Et in hoc quidem illud consolatur me, ac quodammodo recreat, quod a vobis nulla mihi de-

de-

## (XVI)

deprecanda sit adulationis opinio, quum luculentissimum testem habeam CLEMENTEM XIII., quem diu optamus incolumem, una cum omnibus Lotharingæ, Etruriæ, ac Germaniæ Pontificibus. Quæ, Deus bone! & quam constans FRANCISCO auctore nunquam dissentiente, semper autem suffragante Imperii, & Sacerdotii conjunctio! Quanta facta est utrique ex hac mutua consensione dignitatis accessio! Dicant hic rerum divinarum, humanarumque perturbatores, qui in invidiam Ecclesiasticos viros vocare plerumque solent, quid de FRANCISCI potentia, quid de ipsius majestate detractum fuerit, quod Ecclesiæ jura rata atque firma, illamque summa in tranquillitate esse voluerit? Præstantissimum illud, maximæque laudis instar erit, quod Eo per viginti annos imperante aut nulla, aut certe levissima dissensionis initia extiterint; nullum vel dictum, vel factum, ex quo abalienati animi ne parva quidem suspicio emerferit; uno verbo, nihil fuerit, in quo ne Religio aliqua ex parte labefactaretur, Apostolicæ Sedi operam ipse suam, laborem, & diligentiam recusaverit. Quam certe laudem paucissimis, qui ante ipsum fuerunt, esse tribuendam affirmare mihi posse videor. Quamvis enim in promovenda, & amplificanda hujusce Sedis auctoritate clarissima eximia pietatis signa, atque indicia patefecerint, tamen aliquando ea discordiarum semina jacta sunt, quæ in apertum bellum excrevissent, nisi summa prudentia huic malo fuisset occursum. Quod temporum illorum conditioni, & nonnullorum dolis,

& ver-



( XVII )

& versutiis vitio fortasse dandum est , quippe qui malis artibus , fraudibusque Principes optimos circumvenerint ; at FRANCISCI cura & auspiciis omnia prorsus pacata , omnia timore vacua , omnia in tuto posita. Quæ dum mecum animo reputo , latissimum mihi campum aperiri video ad Illius , quem prædicamus , singulare decus , egregiaque in nos merita extollenda , in quo sane libentissime pervagarer , nisi temporis angustiiis prohiberer . Mente vos , & iudicio ipsi vestro expendite , quæ summam , ac strictim a me dicenda erunt . Memineritis , quæso , quam fœda , quam deturpata , quam luctuosa non paucis in locis sit Germaniæ facies , quoque in statu apud eos res nostræ sint , qui a Romanorum Pontificum communione perditis hæreticorum consiliis jamdiu desciverunt . Cuncta ubique pessumdata & profligata ; ubique acerrimum odium , quod sæpe importunis discordiis ac seditionibus , quasi ventis quibusdam , agitatum apertius exarlit ; ubique educti , districtique gladii , quibus irruentes in nos , uti vocant , adversarios suos impetum faciant . Adde Regum potentissimorum favorem , & gratiam , quos doctrinarum suarum fautores , & vindices adsciverunt ; adde intemperantem dominandi libidinem ferro , flammaque grassantem ; adde sanctissimarum legum contemptum , ingenium pervicax , & inexplabilem erroris late disseminandi cupiditatem . Hæc qui videat , animo pene concidat necesse est , & candidissimam Christi vestem teterrimis infectam maculis , nigro cruore conspersam , & impie discissam miserrime ingemiscat . Erit igitur optimi , piissimique Imperato-

ris ex alto , & tamquam e sublimi specula prospicere , quod si huiusmodi dissensionum turbines componi , ac sedari non possint , saltem ne fluctus excitent , quibus omnia horribili quadam tempestate absorbeantur . Quorsum hæc , Auditores ? Ut nempe vobis uberius cognita , ac perspecta sit singularis , ac pene divina FRANCISCI pietas , qua cautum est ( amplissimos eos nunc iterum testes adhibeo , quos superius nominavi ) ne sædissimi morbi contagio latius serperet , ne ab impotenti hæreticorum licentia aliquid Respublica detrimenti caperet , ne se imperante aliquid mali , & calamitatis crumperet , quod aut boni metuerent , aut improbi nefario scelere auderent .

Neque vero credatis hæc ab eo gesta sine earum , quæ pietatis administræ , ipsique ornamēto sunt , societate virtutum . Ea enim bonarum omnium artium procreatrix , & quasi parens est , ut merito affirmari possit ceteras ab hac una , veluti a Sole cælestia corpora , lucem splendoremque suum mutuari . Quæ quidem quum in FRANCISCO altius , quam credibile sit , radices fixerit , quanto eam putatis virtutum omnium apparatu in apertum prodiisse ? Vidit profecto Austria , Lotharingia vidit , vidit Etruria effusam ipsius in pauperes liberalitatem , in moribus mansuetudinem , in sermone modestiam atque humanitatem . Quo vero in Principe aut major , aut admirabilior eluxit in negotiis licet arduis constantia , in singulis audiendis facilitas , privatis in rebus frugalitas , in publicis splendor , in verbis factique veritas ,  
in

( XIX )

in quotidiano convictu ac consuetudine hilaris quidam lepor , & jucundissima urbanitas ? Quæ sane ita ab Eo in hac tanta dissimillarum virtutum copia mirifice conjuncta sunt , ut nihil de majestate simplicitas , nihil de gravitate comitas , nihil de dignitate festivitas unquam decerpserit . Jam vero quis in fide maritali servanda FRANCISCO firmior ? Quis lectissimæ , ac benemerentissimæ Conjugis amantior ? Quis in augusta Prole sanctissime instituenda , optimisque imbuenda disciplinis studiosior ? Quis adversus quoslibet omnes ita propensæ ad beneficia voluntatis , ut semper verbis significaverit , revera ostenderit suorum salutem , liberos , famam , fortunas sibi esse charissimas ? Credo equidem neminem fore , qui hæc splendide potius , quam vere a me dicta arbitretur , præsertim si memoria teneat , quot cives Ille Viennensi in urbe servaverit , cum repentina , nocturnaque Danubii alluvione totum Leopoldi suburbium , quam late patet , aquis affluentibus inopinate , nec illis tale quid suspicantibus , occupatum est . Nunquam excidet eorum ex animis grata illius diei recordatio , cum ceteris præ timore opem negantibus FRANCISCUS unus inventus est , qui naviculam cum paucis conscendens sui muneris esse duxit , illis domi conclusis , fame languentibus , & consternatis suppetias ferre , ostiatim quid opus esset sciscitari , cunctos ciborum copia reficere , & in tanto ac tam sævo periculo ex ipsius mortis ore , ac pene faucibus cives eripere , suæque vitæ incolumitati , ut aliis præsto esset , non parcere . Ignoscite , quæ-

so, Auditores, si acervatim hæc a me sunt vobis exposita, & si pulcherrimas illas, quæ cum FRANCISCI pietate copulatæ, ac quodammodo conglutinatæ sunt, virtutes potius vobis enumeraverim, quam expenderim. Sine quodam piaculo hæc a me præteriri non poterant, sed quia vobis nota, & longe lateque disseminata, illud mihi permittendum putavi, ut unoquoque ipsorum mollius, celeriusque defungerer. Satis igitur vobis sit hæc una de Ipso verissima testificatio, regias omnes virtutes, quæ Viri Principis bene morati sunt, ita in eo enituisse, ut omnium ille sibi admirationem conciliaverit; nullum unquam maritum extitisse, qui a sponsa, nullum parentem, qui a liberis, nullum regem, qui a populis Illo vehementius diligeretur; qui veluti Titus alter cunctorum in amore, & in deliciis esset; qui exterarum nationum, omniumque Principum ita corda sibi devinxerit, ut pene illius voluntatem pro legibus, pro mandatis consilia, decreta pro oraculis amplecterentur. Sed jam vereor, in adumbranda hoc longo verborum ambitu piissimi Imperatoris imagine, ne recens adhuc vulnus vobis refricare, & desiderium tam chari capitis ardentius, quam consilii mei ratio postulat, innovare voluisse videar; quare ad alteram orationis meæ partem citato gradu me conferam, ut illum quemadmodum Pii, ita quoque Felicis appellatione dignissimum fateamini.

In quo genere laudis non tam illud mihi expendendum arbitror, quæ & quanta FRANCISCUS faustis semper ominibus pro voto obtinue-

tinuerit, quam qua ratione, quibusque honestissimis artibus ad amplissimum beatitudinis culmen pervenerit. Non enim veram censeo felicitatem, quæ a virtute sejuncta sit, maximoque in errore versantur, qui prosperioris fortunæ usum scelere, libidine, flagitiis omnibus inquinatum felicem autumant, & invidendum. Oderunt quique sapientes viri, illorumque memoriam execrantur, qui rerum omnium contemptores divina, & humana jura pervertunt ad felicitatem sibi comparandam, illosque miserrimos judicant, quod probitatis adminiculo destituantur. Verum non idem est de honestis, optimeque moratis hominibus judicium, atque sententia. In eo enim quod quisque bonus est, illum quoque beatum, illum felicem, illum Deo acceptissimum prædicant, quum virtute ipsa major quædam, ac præstantior felicitas nec quæri a Deo, nec accipi ab hominibus possit. Alii igitur fortasse laudaverint perpetua in rebus bellicis scientiæ, ac fortitudinis monumenta; alii diuturnæ victoriæ insignia ex hostibus reportata, captas innumeras obsidione civitates, & imperii fines amplificados; alii regna acquisita, leges pro arbitrio indictas, ac pene infinitam belli comparandi, instituendæque pacis auctoritatem: ego vero, si duce, aut focia virtute hæc fiant, si nihil perperam, si nihil per vim, si nihil fraudulenter, si demum omnia pro æquitate, pro regni jure tuendo, pro majestate vindicanda suscepta, & felicem ad exitum perducta fuerint.

Quæ cum ita sese habeant, de FRANCISCI

felicitate sic statuo, eam in illo absolutissimam fuisse, eoque in gradu positam, ut dubitari omnino possit an virtus in illo major, an vero felicitas enituerit. Sic enim compositæ inter se vi-  
sæ sunt, ut ipsius virtus felicitate pulchrior evale-  
rit, summa vero felicitas nonnisi a virtute di-  
manaverit. Itaque dicam ne illum ex ea Gente  
natum, quæ sex huc usque & sexaginta, uno at-  
que continuo successionis ordine, Duces Lotha-  
ringos enumerat; quæ dignitatis splendore, no-  
bilissimique generis vetustate nulli alteri clarif-  
simarum, celeberrimarumque gentium est secun-  
da; qua nulla toto terrarum orbe fortissimorum  
heroum fecundior est atque feracior; in qua si  
prudentiam ac consilium inspicaveris, Principes  
sapientissimos, si pietatem integerrimos, si om-  
nia belli ac pacis decora abunde amplissimos,  
& ornatissimos inveneris? Dicam ne illud admo-  
dum recentibus domesticis exemplis ad summa  
quæque inflammatum, cum parentem habuerit  
Leopoldum, Virum eximia prudentia, ac singu-  
lari adversus Deum pietate celeberrimum, avum  
vero Carolum, fortissimum, præstantissimumque  
Imperatorem? Dicam ne Lotharingiæ primum,  
deinde Etruriæ feracissimum sane, ditissimumque  
regnum Illi commissum, iisque deliciis affluens,  
quibus posset & dignitatem tueri suam, & cor-  
poris, animique solatio indulgere? Equidem hæc,  
licet nonnullis aliis communia, de FRANCISCO  
iterum & tertium commemoraverim, non quod  
summam prorsus & absolutam in illis inesse putem  
felicitatem, sed quod divinæ virtuti illius nescio  
quid

quid videntur attulisse decoris & ornamenti.

Verum aliud profecto est, & hoc meo quidem iudicio maximum, cur illum felicissimum nuncupemus. Quid hoc est, Auditores? Quod illum Carolus VI. Imperator sibi Generum adsciverit, eique MARIAM TERESIAM Filiam suam tot regnorum ac provinciarum ex asse heredem nuptum collocaverit; quod hoc vinculo utramque Familiam Lotharingicam & Austriacam ex Hugone Alsatiæ Principe procreatam unam iterum eandemque fecerit; quod FRANCISCUM quodammodo designaverit, elegeritque, cui Germanici Imperii fasces committerentur. Quod quidem non tam fortunæ, quam quod longe præstantius est, virtuti ipsius tribuendum existimo. Nam cum de re tam gravi ageretur, cui nempe Filiam suam sibi charissimam, omnique virtutum genere ornatissimam matrimonio jungeret, atque adeo totius Austriacæ Domus splendorem & decus concrederet, putatis ne, Auditores, Carolum VI., Virum suorum temporum sapientissimum atque prudentissimum, cæco quodam impetu abreptum temere id, & negligenter egisse; an vero nullum non movisse lapidem, sedque diligentissimum præstitisse, ut virum reperiret dignum TERESIA Filia, & in primis idoneum ad Austriacam magnitudinem conservandam, atque amplificandam? Videor nunc mihi illum videre de gravissimo hoc negotio anxium atque sollicitum universum terrarum orbem oculis collustrantem, & potentissimos quosque reges, sed præsertim Germaniæ optimates regibus ip-

sis & vi, & dignitate pares intuentem, illorumque mores, facultates, & ingenia curiosissime investigantem, ne in maxima re prudentiæ suæ, quam vel in minimis semper prætulera, aliqua apud posteros negligentia nota inureretur. Omnes profecto maximos, omnes & gloria, & nobilitate, & potentia, & auctoritate spectatissimos comperit; tamen ex illis neminem, sed unum tantum FRANCISCUM Lotharingum eligit, quem sponsum nobilissimæ Filia constituit. Quare quum post longam diuturnamque deliberationem, quem sibi potissimum Generum ex tot summis Germaniæ proceribus, atque etiam regibus caperet, unum dumtaxat FRANCISCUM Carolus VI. ceteris præposuerit: necesse est, dum illi talem tantamque felicitatem compararet, nescio quid eximium ac pene singulare providisse, quo omnium mortalium & optimus, & excellentissimus judicaretur. Qua in re nescio ego, cui magis gratulandum sit, an FRANCISCI felicitati, an vero Caroli VI. sapientiæ. Gratulandum certe FRANCISCO, quod Uxorem obtinuerit feminarum omnium, quotquot in universo terrarum orbe sunt, facile principem, ex coque antiquissimo, ac generosissimo sanguine concretam, qui ferme innumeros Reges, atque Imperatores in lucem edidit, qua nulla alia pulchrior, nulla castior, nulla corporis animique dotibus ornatio, & cui laudandæ nulla satis apta inveniri possit oratio. Sed quoque Carolo gratulandum, cujus pene divino consilio factum est, ut quam in FRANCISCO virtutem detexerat, maximoque affecerat præmio,



ea omnium in oculos infiliret , tantamque sibi conciliaret auctoritatem, ut demum illum ad summum Imperii apicem evexerit.

Decrat profecto hoc illi unum , ut ad augendam suæ felicitatis gloriam omnium eorum suffragiis, penes quos liberum est eligendi jus, & arbitrium, Imperator renunciaretur. O diem illum, Auditores, jucundissimum, & honorum omnium votis expectatissimum, qui faustis auspiciis non Germaniæ solum, sed & Italiæ, totique Europæ nitidissimus illuxit ! Jam fere quinque annorum spatio acerrime dimicabatur, ex quo potentissimi Reges in florentissimas eas provincias, & regna, quæ jure hereditario MARIA TERESIA a Patre acceperat, infestissimis armis irruerant. Externo ubique milite premebatur Germania, & cum intestinis, civilibusque discordiis contereretur, exteris undique nationibus in belli societatem accitis, suo se ferro illis jugulandam dederat; ipsa quoque Italia cæde, ac sanguine redundabat, nullaque pene Europæ pars erat, quæ sanctissimo illo incendio non conflagraret. Hanc si quis iniquissimorum illorum temporum imaginem sibi iterum repræsentaret, nonne totius Germanici Imperii incolumitati conclamatum esse diceret, & desperatis ac perditis propemodum rebus omnia teterrimis illis bellorum turbinibus corripì, & ad interitum exitiumque vergere? Non quidvis existimaret potius, quam res omnes in integrum restitui posse, & ab illis tam diuturnam pestem ac perniciem depelli? Igitur hoc major FRANCISCI I. Imperatoris felicitas habent-

habenda est, quo intricatior ac turbulentior fuit temporum illorum conditio. Etenim felicitatis FRANCISCI fuit imperium illud, quod jamdiu sibi debebatur, quodque demum turbatissimum capeffivit, pacatum reddere, cuncta Germaniæ membra variis in locis dispersa, ac dissipata colligere, suoque corpori restituere, turbas omnes qua auctoritate, qua consilio, qua armis compescere, atque ex intestino illo funestissimoque bello Germaniam ipsam una cum Italia, totaque Europa ad concordiam adducere. Vere itaque felix, imo felicissimus FRANCISCUS I. Imperator, qui non bellum ex pace, ut illorum nonnulli, quos nobis hoc nomine commendavit antiquitas, sed ex bello pacem quæsserit; majoremque ex hac laudem ac gloriam & jure & merito obtinuerit, quam ceteri quique ex armorum terrore, ex discordiis, bellorumque tumultibus sibi pepererint. Quo sane bono diutissime ille lætatus est; & quamvis extremis hisce temporibus ad arma capienda, invitus licet, compulsus fuerit, tamen vel in hoc sibi illud feliciter obtigit, ut Germanici Imperii incolumitati pro munere suo faustissimo eventu consuluerit, & iis, quibus opitulaturus venerat, maximæ fuerit utilitati, & adjumento.

Et quoniam de bellicis FRANCISCI laudibus opportunus incidit sermo, non abs re fuerit pauca quædam de illis delibare, ne in re tam magna parum videamur de ipsius gloria solliciti. Laudandus enim quicumque ille sit, qui imperio polleat, si populorum quieti, & tranquillitati

(XXVII)

tati studuerit; sed laudandus quoque est, si ab hostibus laceffit exerto gladio illorum impetus contuderit, & felici Marte pugnaverit. Nam quis ille demum mihi fuerit, qui ut otiosus vivat, omnia cogatur perpeti, & militaris artis ignarus nesciat illatas sibi injurias ulcisci, & se, suosque a fœvissimorum hostium incursione defendere? A qua reprehensione quam abhorrerit præstantissima vel in bellis FRANCISCI virtus, vos ipsi judicato. Recordamini difficillima, & gravissima prælia cum impiis, barbarisque nationibus in ultimis Pannoniæ finibus ab eo commissa; recordamini sanguine ipsius non semel, sed pluries opulentissimum Austriacæ Domus patrimonium defensum, & conservatum; recordamini Germaniam universam pristinum in statum restitutam, exercitus fugatos, munitissimas hostium arces aut solo æquatas, aut in ditionem redactas, & immensas barbarorum copias parva manu ab eo sæpissime aut victas, aut repressas, aut retardatas. Quibus quidem in bellis strenuum se, fortemque Imperatorem gessit; nunquam enim illi defuit in eligendo consilium, in obeundo alacritas, in exercendo industria & labor, in conficiendo sedulitas, atque contentio. Vobis non ignota persequor, Auditores, quæ quoniam fauste, fortunatæque gesta sunt, quodammodo ad meam causam videntur pertinere. Ut enim avitæ virtutis, ita quoque sunt in FRANCISCO certissimum felicitatis argumentum.

Cum vero optatissimum esse parentibus soleat quam simillimos sibi nasci filios, cui hoc unquam

## ( XXVIII )

quam benignius quam FRANCISCO Imperatori concessum est? Cui illud ex animi sententia, successit, ut generosissimæ, numerosæque Proles se patrem viderit, in qua ea constantissima elucet ingenii, virtutum omnium, morumque optimorum similitudo, ut facillimum sit & filios in patre, & patrem in filiis non adumbratum, sed egregie expressum intueri. Quotquot sane aut officii causa, aut visendi studio Vindobonam frequentes ventitabant, insignem in iis pietatem semper admirati sunt, obsequentissimam erga Parentes optimos voluntatem, liberalissimos honestissimosque mores, ingenium suave, & ad omnia vel maxima expeditissimum, ut nemo unquam non dixerit eos quemadmodum patri simillimos, ita quoque imperio dignissimos. Quæ illi, ut usuvenire solet, in posterum providentes vaticinati sunt, omnia, ne quid perfectæ & absolutæ FRANCISCI felicitati deesset, nemo vestrum ignorat quam auspicato contigerint. Etenim JOSEPHUM II. Filium natu maximum Imperatorem designatum vidit, & nobilissimo Principi PETRO LEOPOLDO alteri Filio, se adhuc vivo, Etruriam vice sacra interim regendam, seque demortuo ipsi propriam adsignavit, alia fortasse & reliquis curaturus, si per ipsorum ætatem licuisset, & nisi nobis, iisque omnibus, qui Lotharingicæ, & Austriacæ Domus splendori student, & amplitudini, fuisset mortalitate interceptus. Celebrabatur apud veteres quasi rarum felicitatis exemplum Metellus, quod cum quatuor illi essent filii, cunctos aut Prætorio, aut Consulari, aut Censorio vide-

## (XXIX)

viderat magistratu perfunctos, & triumphalibus ornamentis insignes. Magnum profecto dicendum est fuisse Metelli gaudium; sed longe major FRANCISCI Imperatoris lætitia fuit cum in credibili voluptate conjuncta. Ille enim hæc in libera civitate consecutus est, ubi plus populi, quam optimatum, qui prudentiores sunt, auctoritas valuit; Hic ab amplissimis totius Germaniæ Proceribus, quos nefas est suspicari aut fallere, aut falli posse; Ille lætatus est eos ad filios suos Reipublicæ honores delatos, qui licet maximi, quia in populi tamen manu erant, plerumque etiam indignis mandabantur; Hic suos iis decoratos imperiis, quæ summorum virorum suffragiis non nisi probatissimæ virtutis hominibus committi solent. Hoc sane demum gaudium est, eas in filiis animi dotes intueri, ut nullus non illis honor communi omnium consensione debeatur. Hic est felicitatis veluti quidam cumulus, ad quem si cetera accesserint, quæ modo a nobis perorata sunt, cum nobis Imperatorem ostendunt, cujus vitæ curriculo virtute, ac fortuna duce felicissime exacto nihil majus exoptari, & addi possit.

Sentio me paullatim, Auditores, in eam orationis meæ partem esse dilapsum, quæ tota erit in iis præcipue FRANCISCI laudibus contexendis, de quibus nihil sibi fortuna vindicat, nihil temporum opportunitas, nihil rerum commoditas, sed quæ dumtaxat ipsius propriæ sunt, præque ceteris, si pietatem excipias, primum sibi locum usurpant. Loquor de recta, & æqua il-  
la

la civili Regni administratione, in qua, qui se attemptum, ac sedulum, constantemque exhibuerit, ceteras regias omnes hac una laude complectitur. Nihil enim est cur Reges in hac tanta potestatis inæqualitate Deo simillimos judicemus, nisi quod pene infinita auctoritate præditi nullius subsumt imperio: contra vero ipsorum voluntati, & arbitrio omnia parere jubeantur. Siquidem eorum est leges condere, bellum indicere, pacem componere, fœdera sancire, deque ipsa vita, ac morte decernere. Quis tamen non videat in hac maxima principatus auctoritate quam facile omnino sit a recta via deflectere, & cum unius duntaxat nutu regantur omnia, omnia quoque sive deque habere, nihil pensi facere, & sibi populos, non autem se populis natum arbitrari? Quod mehercule qui sibi persuadeat, de gloria illius in memoriam sæculorum sempiternam actum omnino est; cui enim æquissimi imperii fama comparari debuit, ei crudelis adhæret, superbaque dominationis invidia. Hinc sane quemadmodum, qui filios olim susceperint, suavissimo illo patris nomine, quod ad significandam communionem sanguinis natura ipsa reperit, vocitari amant: ita ex Regibus nullum inveneris, qui Patriæ, hoc est populorum Patrem appellari, seque profiteri non gestiat. Tam dulci se quisque ceteris appellatione commendat, & cum velit amari a suis, suorum se quoque commodis, & utilitati studere, seque illorum amantissimum esse gloriatur, illos præ oculis habere, sinu complecti, & diu noctuque paterno amore vigilare, ut

ut cuncta recte, prosperaque administrantur, ut legibus obtemperetur, ut domicilia, bona, fortunæque omnium in tuto positæ & collocatæ sint, ne quid demum repente insurgat, quod populorum tranquillitati, securitati & otio aliqua ex parte possit officere. Quid hoc Patris vocabulo suavius? quid honorificentius? quid vero difficilius, quod cum laude retineatur?

Veruntamen quod olim & jure, & merito FRANCISCO tributum est, id nunquam dimitendum, imo potius sibi confirmandum curavit. Quæ enim ingrata ei foret ejus nominis appellatio, quo patriam servatam a se, amplificatam & auctam summa solertia, labore & industria significaretur? quo Tullius ille Romanæ eloquentiæ vindex, cui omnium primo post Rempublicam a cæde, ab incendiis, a rapinis liberatam hoc a Senatu concessum est, adeo lætabatur, ut deinde & Rostra, & Curia subscellia, & Deorum Tempла nonnisi hoc nomine personarent? quod demum ceteri omnes Romanorum Imperatores nemini communicatum, sibi que duntaxat reservatum voluerunt? Fuit igitur cur FRANCISCUS eo titulo decoratus sibi plauderet, nihilque haberet antiquius, quam cum se Regem præstare, qui amore in populos alios omnes longo post se relinqueret intervallo. Nullius hic ego nisi unius Etruriæ testimonio utar, quæ FRANCISCI patria facta est, ex quo pacis habendæ ac tuendæ causâ cum ea paternum Lotharingiæ regnum commutavit. Illa enim in hujus locum maximo suo bono successit, nihilque habuit, quod sibi invide-

deret grata quadam recordatione temporum illorum memoriam repetens, quibus suavissimæ Mediceorum Principum libentissime paruit auctoritati. Dicat nunc illa, & elatiori qua possit voce id fateatur, quo incredibili gaudio perfusa fuerit, quibusque lætitiæ significationibus sibi met ipsa plauserit, cum se illi destinatam sensit, quem maxima populorum consensione omnibus belli, pacisque artibus præclarissimum, quem cunctis Principibus Viris, & Regibus, ipsique Carolo VI. Imperatori acceptissimum, quem a sapientia, ab æquitatis, bonique publici studio, a liberalitate, a clementia, a litterarum patrocinio laudari passim audiverat? O si illa non semel tantum Regem vidisset suum! O si hic Etruriæ, fixo jam ac stabili regni sui domicilio, se perpetuo spectandum fruendumque præbuisset! O quæ beatissima duxisset tempora magni sui Ducis præsentia & aspectu recreata! At scitis vos, Auditores, FRANCISCI potentiam & majestatem non potuisse angustis Etruriæ limitibus contineri, longeque ab illa majora, imo maxima imperia ei divinitus decreta & adsignata. Verum in hac tam magna locorum distantia, & in ea multiplici curarum, quibus pro Germanico Regno detinebatur, varietate nunquam Etruriæ suæ ille defuit, & quamvis absens hujus felicitatem suis humeris innixam animo præsentissimo sustinuit, promovit, amplificavit. Hoc sane quidem usque ad hæc tempora mirum in modum experta est per Viros prudentissimos & sapientissimos, quos ille vice sui Etruriæ regendæ præ-

fe-



fecit, quorum ea dum fidem, integritatem, & virtutis atque ingenii excellentiam quotidie fuspiceret, providentissimi quoque Principis in FRANCISCO amorem est admirata, qui ejusmodi prestantissimis hominibus rerum Etruscarum summam commiserit, quibus cordi esset in publicis, privatisque negotiis probitatem, honestatemque in consilium adhibere. Quod idcirco vobis commemoratum volui, ut quemadmodum ab initio proposui, amantissimi in eo Patris solertiam & curam intueamini. Nam quis paullo prudentior ac perspicacior eximiam ipsius prudentiam, ac pene divinum consilium non celebraverit, quod cum ipse per se non posset, eos sibi in curarum partem adjunxerit, qui, ut eventus ipse mirifice comprobavit, nulla macula aspersi Regis sui gloriam, majestatemque tuerentur, & Etruscae gentis felicitati prospicerent?

Hoc procul dubio omnium illi bonorum initium fuit, ac fundamentum. Non omnia enim FRANCISCUS poterat sine his integerrimis voluntatis suae administris; hi vero quid magni egissent, nisi illum ad benefaciendum maxime propensum habuissent? Hac igitur animorum consensione nihil Etruria de pristina sua dignitate, tranquillitate & commodis unquam amisit, imo potius quae prius habuerat, adauxit, & ea, quibus olim caruerat, nova quadam accessione sibi comparavit. Oculos, quaeso, intendite, Auditores, in eam florentissimam, fortunatissimamque regionem, quae ad septentriones vergens huic nostrae contermina est ac finitima, illamque, quam late pa-

tet ; intuemini . Regio sane montosa , sed iis omnibus , quæ ad victum , voluptatemque necessaria sunt , abunde ferax ; populi olim bellicosissimi , nunc quidem militiæ expertes , sed paci potius studentes , & quarumcumque artium , scientiarum ac disciplinarum laude præstantissimi ; plurimæ , & maximæ , & opulentissimæ in ea civitates , quarum magnitudinem vel inde quis facile metiri poterit , quod unaquæque ipsarum antiquissima armorum & litterarum gloria claruerit , quod diu libertatem servaverit , suisque legibus usâ fuerit , quod nulla denique sit , quæ non multos in lucem ediderit viros bellica virtute , & ingenii præstantia celeberrimos . Hæc beatissima non exigua Italiæ plaga illa est , quæ incolarum nobilitate , soli ubertate , cælique clementia nulli alteri invidet , & quam FRANCISCUS sibi ita regendam duxit , ut nulla vel minima Etruriæ pars sit , in qua & sapientia , & providentia ipsius occupata non fuerit . Non est cur aliqua de hoc suboriri possit dubitatio . Percontemini , si vultis , Auditores , quascumque illius regionis loca frequentissima , nobilissimasque civitates , quibus nisi persuasum sit se in eo Patrem benemerentissimum anuisse , vobis permitto , ut nullam orationi huic meæ fidem habeatis . Sed non ego fallor , Auditores . Aures quotidie nostræ omnium litteris & fama celebrabantur novis monumentorum nominibus , quibus FRANCISCUS Cæsar communi utilitati serviens immortalis , æternæque gloriæ fundamenta excitavit . Vias publicas aut adducendis , aut alio absportandis mercibus idoneas ubique audivi-

divimus magnis sumptibus aut iterum ab eo stratas, aut mitiori clivo deductas; Thermas Pisano in agro magnificis ac regiis ædificiis instructas, & in ea loca vastissima, quæ in tractu Senensi sunt, & mare terminantur, missas grandi pecunia hominum rusticorum colonias, quibus & cultiora, & frequentiora redderentur. Quod fortasse felici exitu perfecisset; doctissimis enim viris in consilium adhibitis, omnibusque ipse per se, quibus opus erat, sedulo expensis quadringenties HS. de fisco principis in eam rem infumenda decreverat. Nihil autem hic moror, quod non absolverit; cum enim de hac ejus voluntate non multo ante, quam moreretur, fama percrebuerit, maximam vel ex hoc, meo quidem judicio, liberalitatis, & providentiæ laudem adeptus est. Quid vero dicam Liburnum munitissimam urbem, atque alterum totius Italiæ emporium amplissimis auctum FRANCISCI muneribus, cum merces eo adventas ab omni portorio immunes indixerit, universisque nationibus, ut eo se ex quacumque orbis terrarum parte conferrent, tutissimum aditum patefecerit? Quid illum mercatorum negotiationibus consulentem pacem cum omnibus compositam, ac fœdus prudentissime initum sanctissime quoque servasse, ut quavis cuncta bellorum tumultibus quaterentur, Etruria sua omni bonorum, ac rerum copia abundaret? Quid hanc ipsam proxime elapsis annis summa rei frumentariæ inopia ita provido FRANCISCI Cæsaris consilio sublevatam, ut dum una cum reliquis Italiæ provinciis caritatem præsentem, futuramque fa-

mem deploraret, hanc repente ex maxima frumenti difficultate incredibilis annonæ vilitas sit subsecuta?

Horreo totus animo, Auditores, omnibusque pene artibus contremisco, cum ultimam illam recordor, in qua versabamur, calamitatem, quam si leviozem, imo ut verissime loquar, si pene nullam admirabili CLEMENTIS XIII. providentia sensistis, non ideo tamen eam credatis aut minoris faciendam, aut parvi momenti fuisse. Periculum erat, ( fatendum enim est ) ne cultiores, florentioresque Italiæ provinciæ inedia ac fame divexarentur, aliorumque morborum vi ingruente, qui eam necessario comitantur, in ultimam exitiosamque perniciem, miserrimumque statum adducerentur. Hisce aliisque malis, quæ & ipsa Etruria tunc maxime formidabat, quis præsentî animo occurrit, nisi FRANCISCUS? quis soluta ingenti pecunia, & frumento undique vel ab ultimis regionibus comparato, quemcumque timorem ab Etruria depulit, nisi FRANCISCUS? Quis, nisi FRANCISCUS, in hac gravissima re ita sapienter se gessit, ut Etruriæ populi prius se a caritate, & fâne liberatos, quam in hoc tam magno discrimine se versâtos audiverint? Quis denique, nisi FRANCISCUS, anno superiori ad ejusdem ab Etruria deprecandam calamitatis suspicionem plurimas naves frumento onustas Tergestino e portu brevi mittendas promisit? Miramini hæc, & quidem merito, Auditores, ego vero non ita, ut nova quadam & insolita admiratione percellar. Qui enim a FRAN.  
CISCO

( XXXVII )

CISCO hæc speranda non fuerant ; quem toto vitæ suæ curriculo ita beneficum ac liberalem accepimus , ut neminem unquam nisi muneribus ornatum abs se dimiserit ? Qui privatos homines , majestate quodammodo exutus sua , benigne alloqui , ac peramanter amplecti consueverat , non omnium Etruriæ populorum in tanto periculo voces audiret , omnemque curam in iis sublevandis impenderet ? Non is in summa annonæ caritate filii pecuniam libentissime infunderet , cui nullus unquam dies elapsus est , quo non aliquo homines affecerit beneficio ? In hoc mehercule Tito ipso majorem dico ; ille enim unum saltem se perdidisse diem conquerebatur , quod amicorum nemini liberalitate sua in eo profuerat , FRANCISCUS vero quotidie bene omnibus faciendo nullam temporis jacturam passus est . Id præsertim testantur valetudinarii , & veterani milites , quibus exauctoratis & domum , & stipendia adsignavit ; testantur familiares ipsius , qui ingravescente ætate in ejus munificentia senectutis solatium invenerunt ; testantur ipsorum familiæ , quas illis demortuis paterno amore fovit , & uxoribus ; filiisque alimenta præbuit ; testantur puellæ ingenuæ , quas , ne in turpi egestate consenscerent , honestissime collocavit ; testantur pueri in orbitate vitam agentes jussu ipsius alti & educati , pauperum egrotantium hospitia magnis aucta redditibus , novarum artium gymnasia undique patrefacta , præmia ad excolendos agros statuta , & ingens pecunia tenuissimis hominibus stipem quærentibus quotidie erogata .

(XXXVIII)

Possẽm equidem & alia plura præclarissima providentiæ, liberalitatis, & munificentiæ, quæ in FRANCISCO enituit, testimonia proferre, sed in eo laudando quidam adhibendus est modus, ne videar ego in singulis vel minimis recensendis aut patientia vestra abuti, aut reliquarum FRANCISCI virtutum quodammodo oblivisci. Nolite tamen, quæso, Auditores, quæ modo de his a me disputabuntur, brevitate potius dicendi, quam magnitudine singulorum expendere, illudque vobis statuere, non omnia, quibus excellit optima alicujus regni administratio, a me pro dignitate posse tam brevi orationis ambitu comprehendendi. Quare facile, nec gravate, ut arbitror, patiæmini, plura a me, quæ de FRANCISCO Imperatore dici possent, aut in præsens omitti, vestræque memoriæ relinqui, aut quæ silentio prætereunda non sunt, simul congesta vestris oculis contemplanda exhiberi. Sed inter hæc allicit me præ ceteris, & quodammodo rapit illius eximia animi facilitas & clementia, non quia reliquis major sit atque præstantior, sed quia gratior, & jucundior, captandisque populorum amoribus accommodatior. Quæ quidem ejus naturæ mansuetudo & humanitas adeo germana illi fuit, ut nesciret injurias ulcisci, imo beneficia pro malefactis rependeret, inimicis perbenigne parceret, & si quid ab eo petebatur, ultro ac libentissime largiretur. Quam profecto virtutem non ideo putandum est minoris habendam, quod Lotharingicæ, & Austriacæ Gentis veluti nativa censeripotest; eam enim idcirco maximis autumo in  
FRAN-

FRANCISCO laudibus extollendam, quod cum utriusque Gentis decora in eum unum concurrerint, illam quoque præ ceteris summis & Lotharingicis, & Austriacis Viris in amore, & in deliciis habuit. Neque mehercule in eo minor justitiæ laus, quam ita semper excoluit, ut nemini, quod suum erat, unquam denegaverit. De qua ut aliquid peculiare depromam, illud præcipue commemorandum arbitror, quod nullum ad ampliores magistratus promoverit, nisi quem in inferioribus de communi bono optime meritum, & quem neque pretio, neque metu, neque gratia ab æquitate deflexisse cognoverat. Illustre hoc quidem commendationis genus est, sapientissimaque ratio publicæ promovendæ felicitatis. Illud quoque non omittendum, eum militari sancti Stephani Ordini pristinam dignitatem adseruisse; quum enim quidam, qui ejus nomine & insignibus immerito gloriabantur, obrepissent, legesque olim statutz non servarentur, ut auctoritatis FRANCISCI fuit pro supremi totius Ordinis, quoungebatur, Magistri officio ex amplissimorum Equitum albo indignos expungere, ita quoque justitiæ, novas leges indicere, quibus antiquis pareretur, nobilissimum Ordinem uberioribus locupletare redditibus, & illius omnes, si quas contraxerat, maculas fordesque abstergere. Cetera, quæ in multiplici Etruscarum rerum gubernatione rectissime ab eo sancta, ac patrata sunt, mitto nunc quærere, compressam scilicet hominum sceleratorum audaciam; frænnum libidini ac licentiæ injectum; nobiles ære alieno gravatos, qui solvendo non erant, si parentum

culpa, munifice adjutos, si vitio suo, etiam patrimonio spoliatos; nocentes, ne bonorum pax, atque securitas perturbaretur, justissimis pœnis multatos; optimos viros debitis præmiis affectos, & gratiam benemerentibus abunde redditam. Dicam duntaxat, quod præter hominum opinionem est, tam legitime, atque æquabiliter justitiam a FRANCISCO administratam, tantaque clementia summi juris rigorem ab eo mitigatum, ut nihil ex unius virtutis officio sibi altera usurpaverit, sed utraque ipsarum ad paternæ FRANCISCI sollicitudinis, curæque laudem inita quadam inter se societate consenserit.

Venio nunc ad extremum, & quidem illustre orationis meæ argumentum, quod a FRANCISCO Cæsaris erga litteras, litteratosque homines studio & voluntate desumitur. Doctissimis Græciæ viris olim placuisse scimus tum demum felices eas fore respublicas, in quibus aut philosophi regnarent, aut reges per omne doctrinarum genus excurrerent, sed præsertim philosophiam excolerent. Quam celebratissimam Platonis sententiam sapientissime ab Aristotele interpretatam legimus. Negat enim reges, principesque viros valde quidem eruditos esse oportere, cum id nimis otii exigat, & parum iis adferat dignitatis; sed quam maxime optandum esse ait, ut præclarissima quæque ac nobilissima studia solerti cura promoveant, & litteratos tanquam divinum quoddam hominum genus amore suo prosequantur. Istorum nimirum doctrina reipublicæ salutem adferi, legum auctoritatem sustineri, bona

na



na omnium, fortunaeque conservari, & si quid dignum memoria sit, ad posteritatem extendi. Quae si ita sunt, ut revera sunt, quis te beatissimam, felicissimamque, Etruria, non appellaverit? Dicebaris olim beata, quod intermortuas a septingentis amplius annis in Italia litteras, bonasque omnes artes & disciplinas in situ, & squallore jacentes excitaveras, tuamque in clientelam receperas. Felicior deinde visa es, quum Mediceorum Principum cura & liberalitas renata in te severiora studia beneficentissime fovit, egregie dotata reliquit, & ad summam amplitudinem ita egressa, ut perpetuum, ac quodammodo proprium sapientiae domicilium & sedes evaseris. Quidni ego nunc te fortunatissimam nuncupaverim, quae talem Regem sortita fueris, qui ad litteras protegendas, & amplificandas nihil non omni tempore profuderit, qui quod alii inchoaverant, alii bonis alitibus auxerant, ipse unus pro singulari sua in illas charitate præclare perfecit, absolveritque, qui denique aliorum maximorum regum vestigia secutus absolutissimum ipse exemplar factus fuerit, quod in artium, scientiarumque patrocinio posteriores reges imitarentur. Ille, ille, inquam, unus eam tibi laudem confirmavit, ut optimarum omnium disciplinarum te diceres altricem & vindicem, talemque, ac tantum hoc nomine splendorem, & dignitatem obtineres, ut jam ei quicquam adiici, & adjungi non possit. Tunc ipsa vides, quo florentissimo in statu res tuae collocatae sint FRANCISCO Cæsare litterarum patrono & fautore. Prudens ego nunc,

scien-

sciensque omittam, quæ extra te sunt, pulcherrimam nempe illam veterum omnium numismatum a Carolo Magno ad hæc usque tempora cuforum collectionem; admirabiles eos quoque, rarissimosque naturæ sætus, quibus undique conquisitis, & Vindobonæ Augusta in Domo asservatis nova quædam uberrima & eruditionis, & doctrinæ seges comparata est; amœnissima illa demum viridaria Americanis cujuscumque generis arboribus confita, quibus omnibus & Chronologiæ, & Physicæ, & Historiæ, & Philologiæ rationibus videtur non parum ille profuisse. Quamvis enim hæc missa faciam, quæ certe maxima sunt, & ad FRANCISCI laudem conducibilia, plurima tamen, ac propemodum infinita in te una supersunt, quibus quodammodo te ipsam possis erigere, meritoque lætari. Veteres enim bibliothecæ maximis & copiosissimis auctæ sunt librorum accessionibus, novæque ejus auspiciis ad studiosæ juventutis commoditatem recenter instructæ, quas inter lectissimæ illæ atque locupletissimæ, privatæ olim ac propriæ Lotharingorum & Mediceorum Ducum, publici juris nunc factæ; artis Icnographicæ studium novorum præstantissimorum præceptorum sedulo ministerio Florentiæ utilissime excultum; Senensis perillustreis olim Academia, sed annorum lapsu concisa, ac propemodum jacens munificis FRANCISCI manibus erecta, ac sustentata; & illa altera, quæ jubente Cæsare eo consilio nuperrime instituta est Academia, ne Florentini, & ceterarum urbium generosi adolescentes otio ac socordia langueant ab avita majorum suorum

(XLIII)

rum virtute degenerantes, sed ut ingenuis & liberilibus quibuscumque artibus, ac severioribus disciplinis non exigua Reipublicæ Etruscæ utilitate imbuantur. Quo ad commendandum eximium cum erga litteras, tum erga populos amorem suum quid illustrius, aut quid accomodatius excogitari unquam potuit? Etenim intellexit juvenes generis nobilitate conspicuos ad magistratus, ad honores, ad amplissima, eademque gravissima obeunda munera educari, qui si a teneris annis affluescant faciles aures doctorum virorum præbere consiliis, si saniora philosophiæ præcepta tempestive animo imbiberint, & in hac tanta, ac tam multiplici scientiarum & disciplinarum varietate ea præsertim, quæ utiliora sunt, avidissime arripuerint, optime quoque de publico bono, ac populorum felicitate videntur promerituri. Quæ tamen præ ceteris omnibus singularem FRANCISCI Imperatoris amorem experta fuit, illa est nobilissima, ac per totum terrarum orbem celeberrima Pisana Academia, quam ita semper in oculis habuit, vehementissimæque charitate dilexit, ut ejus opera & patrocínio nulli alteri secunda, plurimarum certe sit princeps. Testes hic vos appello illius Athenæi doctissimi, amplissimique Sodales, quos doctrinæ, penitiorisque eruditionis laude præstantes undique magnis muneribus accitos instruendæ Etruscæ juventuti præposuit. Præconiis ille vestris, justissimisque laudibus quam sæpissime affectus est, quod non nisi eruditissimis, sapientissimisque viris in collegium vestrum coopertis totius Academiæ & gloriæ studuit & ampli-

## (XLIV)

amplitudini; quod bibliothecam & quidem pretiosissimis refertam libris vobis comparavit; quod vos uberioribus stipendiis ditari jussit; quod summa summæ doctrinæ præmia & beneficia, semper attribuit. Illum vobis uno ore acclamantibus eximia pietate conspicuum, illum perpetua usum felicitate, illum regis omnibus ornatum esse virtutibus, illum vere paterno amore in litteras, litteratosque homines, atque adeo in universos Etruriæ populos perfunctum fuisse aures quotidie nostræ personabant; nunc vero o veris mortalium vices! o miserrima humanarum rerum conditio! dum majora, si fieri ullo modo poterat, in dies expectabamus, dum FRANCISCO I. Imperatori, Augustæ Conjugi, generosissimis Filiis fausta omnia ac felicia adprecabamur, illum cheu! immaturo interitu Germanico Imperio, Etruriæ suæ, totique Europæ sublatum una vobiscum lugemus.

Verum in hoc tanto ac tam repentino casu si perpetuo dolori cedendum esset, Auditores, numquam humanis quibuscumque rebus, quæ naturæ quadam necessitate accidunt, quæque interdum nos angunt, solatium aliquod inveniretur. Fateor & ego quoque improvisa, atque inopinata FRANCISCI morte maximam justî mœroris occasionem nobis oblatam; sed cum talis ille, tantusque Vir, qualem, quantumque huc usque vidimus, diem supremum obierit, quisnam vestrum erit, qui lacrimis & fletu potius, quam jucundissima virtutum ejus, maximorumque in rempublicam meritum recordatione funus ejus cohonestare

(XLV)

stare velit? Quid aliud esset hoc facere, quam præsentem ejus, qua nunc fruitur, ut omnino speramus, beatitudinem indignissime ferre? Nam si pietati singulorum, si religioni, si in reliquos homines charitati amplissima a Deo æqua lance statuta sunt præmia; si eam, quam quis feliciter virtutis auspicio duxit, nova in cælis excipit vita bonis omnibus cumulabitur: quis amplius FRANCISCI morti illacrimabitur? Quis potius illi vere PIO, FELICI, PATRIQUE PATRIÆ jam acquisitam beatissimam immortalitatem non gratulabitur? Quod cum mihi persuasum omnino sit, propterea censeo in hac communi luctus acerbitate animos excitandos, certissimaque ea spe erigendos, fore scilicet, ut Christiana Respublica jam Patre amisso in Filiis habeat, quo gravissimo huic vulneri sibi illato facillime medeatur. Heredes illi paterni regni, & imperii, paternarum quoque virtutum imitatores FRANCISCI gloriam æmulantur, cumque jam illi juvenili adhuc ætate cunctis cum animi dotibus, prudentia, consilio, fortitudine, magnanimitate, amore in populos æquaverint, si ulla id fieri ratione potest, etiam superaturi videntur. Habent profecto Augusta in Matre MARIA TERESIA clementissimi, sapientissimique regiminis perfectissimum quoddam exemplar; habent domesticas celeberrimorum utriusque Familiæ Lotharingicæ & Austriacæ Heroum imagines, quorum aspectu ad ardua quæque aggredienda invitantur, atque incitantur; habent, quod certe maximum ac præcipuum est, tam excellentis naturæ, mitissimi-

(XLVI)

mique ingenii opinionem, ut ad omnia virtutum genera non docti, sed facti, non instituti, sed imbuti esse uno omnium ore dicantur. Optima igitur ab illis, ut cœpimus, in posterum quoque speramus; itaque fiet ut quemadmodum de FRANCISCI I. Imperatoris, ita etiam de clarissimorum Filiorum laudibus nulla unquam ætas conticeſcat.

F I N I S .



92 945433